

## **Kenapa perlu takut dengan COVID-19?**

**Astro Awani**

**09 Ogos 2020**

**Ridauddin Daud,**

SABAN hari orang bercakap perihal COVID-19. Di Malaysia misalnya, hari-hari topik itu dibangkitkan. Di seluruh dunia, sama juga kisahnya.

Amerika Syarikat, Brazil dan India, kes positif di sana sudah mencecah jutaan kes. Tiada pula nampak tanda-tanda kes akan beransur pulih dalam masa terdekat.

Kematian di seluruh dunia juga merekodkan ribuan kes setiap hari. Boleh kata hampir semua negara kini 'dijajah' COVID-19?

Sebetulnya, pernahkah kita bertanya pada diri sendiri, kenapa perlu takut dengan COVID-19?

Virus yang bermula dari China itu tak dapat dilihat dari mata kasar pun, tiada bau, tiada rasa, tahu-tahu melekat pada badan manusia hingga meragut ribuan nyawa.

Bukalah televisyen, bacalah akhbar, layarilah internet, berita COVID-19 ada di mana-mana. Dari Januari hingga Ogos, itulah topik utamanya.

Lazimnya, berita hangat hanya laku beberapa minggu, beberapa bulan namun virus ini, hampir setahun, masih hangat dibicarakan. Sedihnya, ada saja kematian direkodkan setiap hari.

Di Malaysia, setakat artikel ini ditulis, jumlah kematian adalah 125 orang, seperti yang diberitahu Ketua Pengarah Kesihatan, Datuk Dr Noor Hisham Abdullah

Dulunya ramai tidak kenal, tak pernah pun lihat wajah Dr Noor Hisham namun kini beliau dan barisan 'frontliners' negara diangkat menjadi wira negara.

Kes di Malaysia pernah mencecah ratusan kes sehari, pernah juga turun sehingga hanya satu kes sehari, wira negara tanpa jemu berperang melawan COVID-19 demi rakyat Malaysia.

Dari awal tahun hinggalah sekarang, konsisten beliau menasihatkan orang awam supaya jaga diri, pastikan penjarakan fizikal dan patuhi prosedur operasi standard (SOP) ditetapkan kerajaan.

Tapi itulah, kenapa nak takut dengan COVID-19? Bahaya sangatkah virus ini?

Kalau bahaya, kenapa ada yang bersahaja langgar SOP? Kesihatan, keselamatan orang lain langsung tak dipedulikan.

Sudahlah 'degil', orang lain pula jadi mangsa! Tak semena-mena, ramai pula yang dijangkiti. Dari satu negeri, merebak pula ke negeri lain.

Apabila Perdana Menteri, Tan Sri Muhyiddin Yasin mengumumkan pelaksanaan Perintah Kawalan Pergerakan (PKP), rakyat tahu bahawa virus ini 'bukan main-main'.

Ratusan kes positif direkodkan sehari. Rakyat diminta untuk duduk di rumah. Pelbagai peraturan dikuatkuasakan demi memastikan virus tidak merebak.

Namun, ada juga yang memilih untuk melanggar peraturan itu. Bersahaja keluar rumah, kena sergah, barulah kelam-kabut lari masuk dalam rumah.

Tak perlulah dikongsi berapakah jumlah kes langgar PKP kerana sehingga hari ini, jumlah individu yang melanggar peraturan itu pastinya mencecah tiga angka saban hari.

Bacalah, dengarlah kenyataan media Menteri Kanan Pertahanan, Datuk Seri Ismail Sabri Yaakob. Hari-hari ada saja ditahan, dikenakan kompaun kerana melanggar arahan PKP.

Acap kali beliau muncul di kaca televisyen - sehingga baju dipakai disamakan dengan kuih - menasihati hatta memberi amaran tapi ada juga yang tak ambil pusing, ibarat mencurah air di dan keladi.

Berbalik kepada tajuk artikel ini, kenapa nak takut dengan COVID-19?

Mungkin inilah yang berada dalam fikiran mereka-mereka yang bersahaja melanggar SOP sesedap rasa.

Mungkin mereka ada alasan tersendiri, mungkin juga mencipta alasan tapi niat tidak menghalalkan cara. Janganlah kerana anda enggan patuh, orang lain pula terima kesannya.

Lihat saja di negara Barat, negara yang dianggap maju, baik ekonomi dan pemikiran tapi lihatlah apa jadi? Kes berjuta, kematian ratus ribu tapi ada nampak mereka peduli?

Ada yang peduli tapi ramai juga tidak peduli. Mungkin sudah tertanam di jiwa dan minda mereka - Kenapa nak takut dengan COVID-19?

Adakah kita mahu menjadi seperti mereka? Mahukah anda melihat Malaysia merekodkan ribuan kes sehari?

Kasihaniilah frontliners

Jika anda sekarang sedang menggelang kepada dan hati pula berkata tidak, bagus, itulah yang sepatutnya.

Dalam setiap sidang media Dr Noor Hisham, beliau tidak pernah lupa untuk menasihatkan rakyat amalkan 3W dan elakkan 3S.

Lembut sungguh tutur bicaranya walaupun kadangkala berkerut juga dahinya apabila melihat kes meningkat. Namun, nasihat demi nasihat terus disampaikan kepada rakyat Malaysia.

Sejujurnya, majoriti mendengar, patuh kepada nasihat beliau namun tidak juga dinafikan kerana nila setitik, rosak susu sebelanga.

Kerana ada yang degil, semakin bertambah pula kes di negara kita. Tak tahulah apa ada di fikiran mereka, mungkin mereka anggap semua ini tidak serius.

“Ah, COVID-19 saja pun,” harapnya bukan inilah yang tercetus di hati mereka.

Nasihat secara baik, rasanya beribu kali sudah dibuat. Nasihat secara kasar? Tak tergamak pula rasanya, lebih-lebih lagi Malaysia terkenal dengan budaya ketimuran, lemah-lembut dan sopan.

Janganlah kerana itu, ada pula yang mengambil kesempatan. Kasihanilah mereka yang bersungguh-sungguh jaga SOP.

Ada frontliners yang berbulan tak jumpa keluarga, dikorbankan segalanya demi anda. Ya, demi anda, rakyat Malaysia. Janganlah sia-siakan jerih-perih mereka.

Kita sama-sama belum menang tapi boleh menang kalau kita bersama-sama.

Harapnya selepas ini janganlah lagi ada yang bermonolog dalam hati:

“Kenapa nak takut dengan COVID-19?”

Minta dijauhkanlah!

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/kenapa-perlu-takut-dengan-covid-19-254486>